



心肝肚个光景

火車離開花蓮車頭，一路向宜蘭、基隆駛去。這條係最愛个一站(cam+)鐵路，在係退休前後，一年最少愛坐火車來一、兩擺。去个時節毋係憶等工作無心無性，就係還目睡摸些透路目密密養精神，罕得有閒心好欣賞外背个風景。轉个時節就無共樣咧，工作做忒，心情輕鬆，看等外背个山山水水，總係有千百種个感想在心肝肚弄上弄下。這下火車行在共樣个鐵路，看著个也係共樣个山、共樣个海，心肝肚也本本共樣有千百種个感想！

記得有一擺來花蓮上課，下課个時節，一個先生摺係講佢係桃園人，畢業後在臺中教書、結婚。避暑該時兩公婆來花蓮寮，分花蓮个好山好水錫著，轉去就申請來花蓮海唇一隻偏僻个學校教書，一教就幾下年過忒咧。問佢會想轉桃園無？佢應(enˋ) 係講爺衰還健，官使人照顧，等加幾年正看。目珠一瞞，歸十年過去咧，係長下想，該个先生係還在花蓮海唇教書，抑係轉來桃園一家團圓咧？想著好笑，正見過兩擺面个人，嘎變成係个掛吊。

火車假等太平洋緊向北駛，碧海青天，景色迷人。看著撫身臂這遍大海，就特別想念移民對岸个你，幾十年無見咧，毋知你過著好無？康健平安無？海浪一陣一陣對遠遠激(giebˋ)上來，又一陣一陣倒退轉去，佢敢係對對岸來又轉到對岸去？見來到這，係就會將係个祝福摺思念，搭這來來去去个浪花帶分遠方个你，你敢識收著？

天將將會暗下來咧，暗昏暗昏个天色摺外背个景致變到嚟嚟。火車來到一隻無停个細站，看著一個站務人員孤栖孤栖企在無半儕个月臺頂，目激激仔看等火車駛等過。分係想起有一擺係在公車肚，看著高中時節最好个同學企在路臂，自從佢去美國留學以後，就毋識再過看過佢咧，堵堵想愛擊嘴喊佢，公車咻一聲斯過去咧，見擺想著就當難過。這個站務人員日日愛看等幾多車枋駛過，佢敢摺係共樣，也識看著多年無見个親朋好友對面前過，嘴官擘開，車仔就駛走咧，留下無限个遺憾！

火車一站駛過一站，天完全暗下來咧，新竹也看等到咧，係心肝肚一幕一幕个光景也像做電影樣，到愛煞棚个時節咧。火車頭光華華个電火，人聲濟借个場景，摺係拉轉現實來，屋下還有樵、米、油、鹽這兜拉拉雜雜个事等等係呢！整理好心情，攞起包袱行下車，摺該兜心肝肚个光光景景留在車頂，跔等火車走到遠遠、遠遠……。

作者：張美容

☆詞彙學習☆

- | | |
|----------------------------------|------------------------------------|
| 【憶等】rhid nenˋ：記掛著。 | 【弄上弄下】nungˋ shongˋ nungˋ haˋ：鑽上鑽下。 |
| 【無心無性】mo simˋ mo siangˋ：沒有心情、興緻。 | 【將將會】ziongˋ ziongˋ voi+：即將會。 |
| 【透路】teuˋ lu+：整路；一路上。 | 【目激激仔】mug gid gid er：眼睜睜的。 |
| | 【人聲濟借】ngin shangˋ ziˋ ziaˋ：人聲鼎沸。 |

☆文法學習☆

- 【看等幾多車枋駛過】看著多麼多的班車開過去。「幾多」因語氣的不同有二義：1.感嘆詞，「好多」的意思，通常念本調 giˋ；2.疑問詞，「多少」的意思，常會連音變調念成 gi+。
- 例1：毋使愁無人，有幾(giˋ)多人愛去！（不用擔心沒人，有好多要去！）
- 例2：這擺旅行，有幾(gi+)多人愛去？（這次旅行，有多少人要去？）